

da 548738  
4568760  
1  
IN NUPTIIS  
CAROLI BORBONII

UTRIUSQUE SICILIÆ REGIS, &c.

E T

MARIÆ AMALIÆ

WALBURGÆ

SAXONICÆ

REGINÆ

COLLEGII NEAPOLITANI

SOCIETATIS JESU

*Gratulatio, & Obsequium.*



NEAPOLI, MDCCCXXXIX.

*Superiorum permisso.*

1. The first part of the document is a list of names and addresses of the members of the committee.

2. The second part of the document is a list of names and addresses of the members of the committee.

3. The third part of the document is a list of names and addresses of the members of the committee.

4. The fourth part of the document is a list of names and addresses of the members of the committee.

5. The fifth part of the document is a list of names and addresses of the members of the committee.

6. The sixth part of the document is a list of names and addresses of the members of the committee.

7. The seventh part of the document is a list of names and addresses of the members of the committee.

8. The eighth part of the document is a list of names and addresses of the members of the committee.

9. The ninth part of the document is a list of names and addresses of the members of the committee.

10. The tenth part of the document is a list of names and addresses of the members of the committee.

11. The eleventh part of the document is a list of names and addresses of the members of the committee.

12. The twelfth part of the document is a list of names and addresses of the members of the committee.

13. The thirteenth part of the document is a list of names and addresses of the members of the committee.

14. The fourteenth part of the document is a list of names and addresses of the members of the committee.

15. The fifteenth part of the document is a list of names and addresses of the members of the committee.

16. The sixteenth part of the document is a list of names and addresses of the members of the committee.

CAROLO BORBONIO

UTRIUSQUE SICILIÆ REGI

E T

MARIÆ AMALIÆ

WALBURGÆ

SAXONICÆ

REGINÆ.



*I*n communi Urbis huius, ac Regni, quæ Regalium Nuptiarum causa cunctos pervasit

A

fit

*fit lætitia , nostras silere mu-  
sas nec æquum , nec fas esse  
duximus . Exiles eas quidem ,  
atque humiles esse fatemur ul-  
tro , tantæque gratulationi omni-  
no impares : At ubi de obsequio  
erga Reges agitur , animum  
potius , quam muneris exhibiti  
magnitudinem spectandam esse  
nemo non videt . Hinc præ Ma-  
gnatum gemmis , auroque , ru-  
sticorum donaria majori in pre-  
tio sæpe numero sunt . Quale-*  
cun-

cunque hoc igitur infimæ sortis donum clementer, ac benigne, ut soletis, accipite: ac Majorum Vestrorum exemplo devotum hoc vobis Collegium, Societatemque Universam vestro Patrocinio fovere ne renuatis. Sperare id nos jubent præclaræ illæ, quibus abundatis, virtutes: quibus percensendis non mea modo quæ nulla est, sed magnorum item Oratorum facundia frustra insudarit. Ma-  
jesta-


*jestates Vestras Deus Opt. Max.  
diu sospitet , multiplicique , ac  
digna Parentibus sobole augeat:  
Ita totius nostri Collegii nomi-  
ne voco , dum hæc D.D.D.*

*MM. VV.*

*Humillimus Obsequentiss. & Addictiss. Famulus  
Carolus de Bonis S.J. Neapolitani Bonarum  
Artium Collegii Rector .*

# ORATIO.

*Habita a Paschale de Matthæis Societ. Jesu  
Rhetorices Professore.*

I.  Umulas in immensum gaudia REX FORTUNATISSIME: & quantam ex te lætitiā præcepimus quasi per partes, omnem denique simul objicis nova accessione auctam, novisque gratiis jucundiores. Communis illa fuerat bonorum, omnium opinio, cum primum TE, TE inquam, quasi pulcherrimum munus a Deo huic Regno concessum, incredibili omnium ordinum alacritate complexi sumus, tecum unà in hæc loca felicitates omnes commigrasse. Quæ tam vera de te existimatio fidem expectare diu non debuit: Vidimus enim (quæ autem non præclara quinquenni isto Regno non vidimus?) ita statim omnia ex re, ac voto fluere, ut quæ prima præbueras laudum tuarum, quæ felicitatis no-

#### § IV. §

stræ pignora , eo solum non maxima fuisse intellexerimus quod sensimus ampliora succedere . Quæ cum indies creber ille de te , rumor publicæ lætitiæ index , ac nuncius , differret in vulgus , maximum sane communis gaudii fructum ita & cum aliis percipiebamus , & soli , ut cum jucundissima nobis superiora fuissent , jucundiora esse , præsentia viderentur . Hanc siquidem ( quid enim proferre dubitem , quod ab omni assentationis nota vindicat laus ipsa , neque spe ulla , neque metu expressa , sed bonorum omnium voce , ac testimonio comprobata ? ) hanc tu communi lætitiæ summam , gratiamque adjecisti REX OPTIME , ut superiori gaudio gratiam majoris gaudii accessione detraheres : & quem modo injeceras jucunditatis sensum , videreris idem mox jucundius extinxisse . At enimvero quod illud tandem fuisse dicam inopinatæ lætitiæ nuncium , quod omnium animos , diuturno usu assuetos non nisi maxima a te expectare , magnitudine tamen , ac præstantia perculit pene , atque abjecit ? Quid enim ? cum candidissimus ille non hujusce anni solum ,  
sed



sed perennis quoque faustitatis princeps, & auspex affulsit dies, quo die recentis Conjugii primus per Urbem increbuit rumor, qua repente lætitia elati sumus! Ut immutata protinus totius Urbis facies fuit! Ut exultare præter morem omnes, ac triumphare visi fuimus! Quo plane apparuit, quam inusitatæ jucunditatis plenum hoc regale connubium visum fuerit, quod superioris illius, maximæque jucunditatis abolere memoriam momento potuit. Ac tum quidem hujus lætitiæ sensum famâ libavimus. Quid, cum adeunte hanc Urbem, REGINA optatissima, publicum gaudium, non auribus modo, sed oculis, totoque animo hausimus? Mitto hæc, quæ adhuc videtis, gestientium populorum insignia percensere: Illud unum commemorabo, quod & plurimi, qui rem accuratius rimati sunt inspexere: & multi ex vobis consueverunt crebris usurpare sermonibus: Tantam, tam communem, tam effusam omnium lætitiæ, quantam nusquam antea percepimus, ab iis profecto proficisci causis oportuisse, quas nulla possit denique invidia,  
 vel

## § VI. §

vel non fateri certissimas, vel non animadvertere publicas, vel uberrimas non mirari. At quas illas tandem? Circumvenior equidem numero A A. ac pene dicturum exanimat infinita dicendi materies. Num enim vos primum appellem, Neapolitani Cives, quibus isto Conjugio quoddam ad felicitatem quasi signum sublatum est? Borbonia gens occurrit, in cujus potestate multis jam annis reposita felicitas, ad alias primum Nationes, nunc denique ad nos profluxit. Hujus Familiæ auspicia persequar? CAROLUS se mihi offert: cui ea gloria reservabatur, ut illam hîc posset unus novis incrementis cumulare. Tibi REX OPTIME gratuler? dicentem revocabit MARIA AMALIA, quæ secum in hanc Urbem tantum quoque intulit lætitiæ, & felicitatis. Ita neque singula complecti oratione videor posse: neque tamen indictum aliquid relinquere; ne aut vestram fortasse onerem ipsâ bonorum commemoratione patientiam: aut injurius fortunæ nostræ, Regiis Conjugibus ingratus existimer. Quamobrem sic hodie agere constitui, sic omnia, si possim

in

in unum conducere , ut & felicitatis nostræ , & Borbonii nominis , & Regis amantissimi , & Regina præclarissimæ , neque ad breve temporis punctum , aut esse immemores , aut futuri videamur . Atque hunc præstituo orationi meæ modum , ut ostendam **RECENTI CONJUGII FÆDERE BORBONIAM , QUAM CAROLUS INVEXIT FELICITATEM , PERENNI OMNIUM NOSTRUM FELICITATE CUMULATAM.** Neque vero est, cur de benevolentia vestra hodiernâ die laborem: Quos si rem ipsam , si tempus , si voluntates etiam vestras intueor , hortatores quoque ad dicendum habere me video .

II. Et quo planius ex hoc ipso orationis meæ aditu veluti capita fontesque demonstrarem ejus felicitatis , quæ ex Regali isto Connubio in nos dimanat ; duo potissimum hîc statuo , ex quibus oriatur felicitas omnis , & constet necesse est : Alterum , ut præstans quædam adsit bonorum Magnitudo : Alterum , ut secura quoque eorumdem Diuturnitas . Quod utrumque dum ex his nuptiis profluere ostendo , erit profecto , ut quantus

## VIII.

tus Borboniæ felicitati ex nostra etiam felicitate cumulus accedat, vos ipsi intelligatis.

III. Age vero, quam nobis bonorum, magnitudinem recentibus nuptiis Borbonia felicitas attulerit, studiose, ut par est, diligenterque contemplemur. Quamquam si in intimos animorum nostrorum recessus cogitationem referimus, præjudicata quoque a nobis hæc bona fuisse comperiemus. Quid enim sibi illa volebat communis alacritas, qua, vix hujus connubii rumor caluerat, statim a publicis plausibus, & populari acclamatione ad ipsos Principes animum læti traducebamus? Illorum sæpe gratulabamur amplissima cum fortunæ, tum virtutis ornamenta: Novum atque inexpectatum iter ad Regnum: Consecras feliciter Nuptias: Quæque istas probare in vulgus, & commendare plurimæ, & maximæ res videntur. Hæc fere ipsa audiebamus ex aliis: Hæc sæpe iis, quos a rerum usu & cognitione longius remotos arbitrabamur, distincte explicatæ conabamur ingerere. Quibus profecto sermonibus magis animorum æstuabat hilaritas, indeq; in omnium etiam vultus insolens quædam

# IX.

dam lætitia exundabat . At enimvero habet  
 A A. nescio quid , pene dicam, divinum , ac  
 prope fatidicum popularis consensio voluntatum: tametsi enim privata spes frustrari singulos aliquando consuevit ; vix tamen unquam usuvenit , ut publica sefellerit universos. Primi quoque illi æstus plaudentis populi notari a Sapientibus viris, & ominis loco haberi solent : quippe qui natura veluti obstetrice effusi , neque adulandi libertatem , neque simulandi tempus habent : Quid meditati isti , cogitatieque mentis nostræ sensus, qui suscipi , ac deponi morâ ipsâ potuere , quam aperte ostendunt , suo quemque dū , & consilio præsentissimas quasdam ingentium bonorum causas nos omnes persensisse? Ut enim exorientis solis, candor ille illustrior in aere, quasi prænuncius, apparet; ita magnarum felicitatum anteceptam animo quamdam informationem , inusitatae lætitiae parentem, sæpe habemus.

IV. At levibus, puto, de causis, aut vulgi sermunculis hæc est hominum opinio constituta . Imo vero de his Principibus neque existimare secus , neque hæc omnia

B

non

non præſagire ſtatim potuimus: Quorum  
 nomen ipſum quaſi hæreditario jure ampliſ-  
 ſima quædam non minus dignitatis, & po-  
 tentiæ, quam communis etiam boni inſi-  
 gnia objicere populis, atque offerre viſum  
 eſt. Neque vero putetis velle me perennem  
 illam, ac propriam ſive Borboniæ, ſive  
 Saxoniciæ gentis felicitatem aut proferre,  
 magnifice, aut nobis jucundiſſime gratu-  
 lari: Quæ jamdiu graſſata ad gloriam,  
 in hoc præſertim tempore eo denique eveſta  
 eſt, ut maximam, ac præclariffimam orbis ter-  
 rarum partem non modo ſamâ nominis, ſed  
 imperii quoque amplitudine impleverit.  
 Auguſtiora hæc dignitatis monumenta,  
 perſecuti alii cum laude ſint: itaque perſe-  
 cuti, nihil ut eorum vocibus præter æræ,  
 aut marmora, deeſſe poſſit. Me vetera re-  
 vocare neque tempus, neque ratio patitur,  
 neque hæc ingenii tenuitas, quam recen-  
 tium quoque magnitudine opprimi plus  
 etiam, quam oporteret, intelligo. Cum  
 maxime eo fortasſe laudabilius avita hæc  
 generis, fortunæque ornamenta prætermi-  
 tat oratio mea; quo videt facilius quoque  
 vos

vos intellecturos, quanta se offerat in his Principibus laudum seges, quæ præclarissimis Majorum laudibus locum in dicendo nullum relinquat. Faceffant igitur prisca illa utriusque familiæ decora. Id unum, quod proxime rem spectat, quodque non ex Annalium vetustate eruendum est, sed ex memoria hominum recenti repetendum, ut vobiscum existimetis, momentoque suo perpendatis, etiam atque etiam rogo: Quam admirabili nempe consilio, quam non obscuris quoque significationibus ea quæ ex his nuptiis expectanda nobis bona forent, dudum denunciaverit ille Arbiter, ac Moderator Regnorum DEUS. Etenim cum Borbonium, & Saxonicum genus simul indulgere huic regno constitisset, ne forte latere quemquam posset, quantum impertiret boni; videte, quæ recens in utraque ea ipsa gente non modo adumbrarit, sed etiam exprefferit nostræ signa felicitatis. Quæ porro ea sunt? Quæ plane potissima, populisque acceptissima existimantur, regalium stirpium decora: Nimirum nova subinde Regna feliciter nanci-

## XII.

sci: Tum, quæ natiæ sint, ea continuo in partem domesticæ felicitatis vocare. Quæ duo ita connexa in his familiis, atque indiscreta hac præsertim ætate vidimus: ita novam horum Regum gloriam cum nova Regnorum felicitate conjunctam; ut effictum nobis, ac propositum quoddam veluti Exemplar ante videatur eorum bonorum, quæ post alias retro nationes huic Regno nunc destinabantur, cum Stirps utraque novo cognationis vinculo Fortunam utramque inter se alligavit. Et quo clarioribus indiciis teneremus, hæc non temere, non usu, non casu gesta esse, sed præsentiam in iis suam Deum declarasse, atque, in posterum præluxisse; ita certa hæc omnia, ac disposita voluit, ut utrique Reges, iisdem veluti gradibus, iisdem quasi incrementis, ad maximam istam Dominationis amplitudinem, quæ in hac totius Europæ luce eminet, mira quadam ratione proveherentur: tum vero tam late fusam felicitatem, in unum Regali isto Connubio contractam, quasi spem magnam, & exploratam ostentarent. Quæ quidem cœlestis con-

filii



### XIII.

filii ratio, aut ego fallor, aut ex rerum, eventis, ut mortalitas ista fert, res divinas æstimanti non poterit non plena ominis, atque admirabilitatis videri. Quod ut persequar aliquanto diligentius, contendite, quæso vos, recentem istam hinc Borboniæ, inde Saxoniciæ Domus gloriam: Contendite, quæ populis utraque invexit bona: Tum contuemini, ut ad nos utraque collato veluti cursu deflexit. Intelligetis nihil esse, quod non simile prodigio: Nihil, quod non spei bonæ plenum videatur: Nihil, quod non certissima communium bonorum argumenta offerat, atque constituat.

V. In Gallicum Regnum HENRICO MAGNO Duce, quæ singularis fuit in eum Virum, Gentilesque ejus omnes, summi Numinis benevolentia, Borbonia Gens jam ante deducta est. Nihil de Familiæ gloria dicam: Pristinum illius Regni statum considerate. Quot ante procellis, quam turbulentis fluitare? quot externis, quot intestinis convulsum motibus, atque afflictum, suprema in dies macie deformari magis, & confici videbatur? Lugent adhuc earum rerum

#### XIV.

rerum historiæ: ac refugit profecto animus  
eius ævi refricare cicatrices. Agite, con-  
ferte jam istam, quam videmus in præsens,  
& admiramur sub Regibus Borboniis Gal-  
liam, opulentissimam æque, ac florentissi-  
mam. Dubites, num domi honestior ea,  
gens porro fuerit, an foris gloriosior? Num  
ipsamet sibi tantum indulgere, ac polliceri  
potuerit? ut sedes, ac domicilium existi-  
metur, in quo virtus, industria, bonæ artes  
omnes, atque honestiores disciplinæ, quas  
intermortuas eluxerat, non modo revixis-  
se, sed ad ceterarum quoque gentium invi-  
diam, atque admirationem adolevisse, &  
effloruisse gratuletur.

VI. Verum oculos ab hoc Borboniæ fe-  
licitatis prospectu ad Saxoniam gentem,  
quæso vos, referte A. A.: & simillimam,  
quam dixi, in adipiscendis, fortunandisque  
regnis collatam a Deo felicitatem compara-  
te. Neque hinc prisca illa commemorabo,  
cum ea gens continenti quadam dignitatis  
serie late diducta, non modo omnibus pe-  
ne Europæ Regnis hæerere visa est; sed avi-  
tæ potentiæ amplitudinem usque eo com-  
pro-

probavit, ut summa, & ultro oblata sæpe fastidierit, ac recusarit Imperia: Quod, præter ceteros, geminum illum Fridericum, Saxonem, alterum cognomento Gravem, Sapientem alterum, fecisse cognovimus. (a)

VII. Recentiora hæc, quæ nostrâ memoriâ gesta sunt, revocate. Quid tandem? nonne Saxonicam felicitatem Borboniæ parem, ac prope geminam conspeximus; cum superiore sæculo vertente, FRIDERICO AUGUSTO frequentissimis Poloniæ comitiis præclarissimum illud Regnum vidimus sponte decerni? Quod, incredibili populorum studio prius delatum, uni tamen illi deferendum fuisse tum maxime patuit, cum ejus virtute, atque consilio tam longinquum, tam crudele bellum, tam longe, lateque dispersum, resedit repente, & in placidissimam ocii tranquillitatem cessit: Cum redditæ Regno leges, auctæ opibus Civitates, exculti bonis disciplinis Poloni omnes: Et, quæ potissima ejus laudum fuit, ejura-  
ta

---

(a) *Reusner. Leorin. de IMPP. Germ. Famil. num. xvii. Wilbelm. Imhof. lib.4. cap.2. &c.*

## XVI.

ta ab eo hæresis , quam cum ipso nutricis lacte suxerat , atque in amplissimam familiam, magno Religionis incremento, Orthodoxa Fides revocata , non modo eximiam illam in eo animi magnitudinem , & acerrimam Mentis vim , atque Consilii omnibus approbarunt , sed æternam quoque apud posterum ejus nominis memoriam immortalibus monumentis consecrarunt .

VIII. At indiscretam hanc , & populis felicissimam utriusque familiæ similitudinem jamdudum gestit oratio graviore illa , ac propiore conjectura persequi , & informare , quam nuper obtulere fortunatissimi horum Principum Parentes , PHILIPPUS Hispaniæ , & AUGUSTUS Poloniæ Reges : e quorum sinu atque complexu CAROLUM , & MARIAM AMALIAM nobis decerpimus . Quam auspdatum ( boni Cœlites ! ) quam pene par in utroque , quam divinum felicitatis , gloriæque certamen ! Borboniam PHILIPPUS felicitatem in Hispaniensi folio dudum collocavit : Saxoniam AUGUSTUS iterum Polono restituit . Utrumque Pax quædam opima , & egre-

egregia quasi manu deducebat ad Regnum: Utrumque ( ne forte triumphī laus abesset) tetra quādam bellorum facies parumper distraxit: Utrumque constituta populis tranquillitas, parta sibi victoria, gloriosius denique reduxit. Quem deinde senserit Hispania PHILIPPUM tanto jam se ipsa felicior; si ex me quæritis, verbo concludam: Eum sensit, qualem vos ipsi, dum illum commemoro, jam animo depinxistis: Eum, inquam, Regem, in quo naturam indoles, indolem majestas, majestatem Religio prorsus temperarit: ut magna semper molitus animo, nihil unquam, nisi Deo deductore, atque auspice, aggredi; nihil, nisi eodem comite, atque adjutore, gerere; nihil demum, nisi eodem suffragatore, & rectore, perficere jamdiu videatur. Qualem vero cognoverit Polonia AUGUSTUM, si breviter expediam, eum dixero, qualem, quantumque Sapientissimi Electores animo præsensere, cum Regnum illud, quod modo Pater obtinuerat, non dubitarunt subinde Filio deferre. Quo ex judicio tam gravi, tam amplo, tam inibi inaudito, si illum naturā,

C

si in-

si institutione, si spe omnium optimum dicendum esse putabimus A A., nihil amplius de illo dicemus, quam eum fuisse, qui deligi ex omnibus debuerit. Atenim præstabilius aliquanto illud est, quod non ex omnibus modo, sed etiam proxime, & secundum Parentem deligendus esse existimatus est: apud studiosissimam præsertim, supra quam credi fas est, patrii moris, & avitæ libertatis nationem, quæ majorum instituto cautum, sanctumque servat, ne, cui regnum videatur non tam decrevisse, electio, quam successio quasi per manus tradidisse. Quæ plane leges quo minus AUGUSTO officerent, quam periclitata jam tum ejus virtus, quam certa bonorum ingentium spes fuerit necesse est! ut profecto concitatam a se expectationem sustineat ille quidem, ac tueatur, dum concussam Poloniam intestino isto, ac domestico bello, ejus cruda, & recens memoria est, tanto pere pacare, componere, confirmare studet; sed olim spem illam superare vix Princeps Optimus posse credatur.

LX. Verum diutius fortasse, quam opinio

nio ferebat, Parentes felicissimi orationem tenuere: Cum per eosdem præsertim dies initiatus jam a PHILIPPO CAROLUS, atque ad nova Regna informatus, Borboniam huc felicitatem deduxisset. De quo si nihil addi præterea a me posset, ingens tamen, ut puto, bonorum nostrorum argumentum foret admirabilis illa, quam audistis, continuatio, seriesque felicitatis, quam & accepit a maioribus, & ipsemet amplificavit. Quid quod hoc recenti Conjugio e Polonia MARIAM AMALIAM huc advocari vidimus? quasi vero, quæ ante felicitas in plures familias sparsa fuerat, ac diducta, novo tandem fœdere copulata, in unam, eandemque coalesceret. Fuit enim A A., fuit Regiis quibusdam Familiis non solum ad res magnas bene gerendas, verum etiam ad Populorum commoda, & utilitates procurandas quædam divinitus adjuncta fortuna: quæ profecto Familiæ, ut ex veterum monumentis cognovimus, aliæ subinde; aliis ætatibus ab illo rerum omnium Moderatore Deo attributæ fuerunt. De Regia, nunc Saxonica, Borbonicæque Gentis felici-

tate hac utor moderatione dicendi, non ut aliis negem Regalibus Familiis, quas eximie colo, & veneror, arridere bonos Superos, & suffragari; sed ut hæc recentia exempla Felicitatis Borboniis, Saxonisique, dumtaxat Principibus peculiaria esse affirmem: tum vero tantam, tam consimilem fortunæ societatem, non nisi Divino quodam numine, ante has nuptias putem contigisse. Nisi vero putemus, aut sine Dei consilio dispensari tot Regna potuisse: aut tantam gloriæ, tantam felicitatis similitudinem temere, & casu aliquo obvenisse: aut non Deo provisam, ac præstitutam hanc utriusque Familiæ conjunctionem, cui tam recens honoris accessio inopinatis quibusdam gradibus muniebat viam. Divinasset enim nemo, cum, Augusto Poloniæ Regnum ingrediente, tantopere dissidere Saxonica, & Borbonia gens inter se videbantur, confecto denuum bello, inde Reginam huic Regno petendam, unde totius belli impetus erupisset. Nunc vero in eo ipso illustrem, divinæ Potestatis, & Sapientiæ vim quis non dignoscit? quæ cum semper consuevit  
ini-



initia, progressusque rerum ad summam aliquam ante destinatam referre; tum has rerum vicissitudines, latente quodam nexu causarum, ita administravit, ut & Regales has nuptias paulatim apparasse, & earum faustitatem nobis auspicatissimam in ipsa, æqualitate fortunæ, in tam simili utriusque familiæ gloria, in tot ante populorum felicitate aperte præsignificasse videretur:

X. Atque hæc fere omnia fuerunt, quæ, si nunc intimos animorum nostrorum sinus cogitatione disquirimus, auditâ hujus connubii famâ, spem tacitam nobis objiciebant ingentium bonorum, & tam effusa illa gaudia concitabant. Cum enim, ut aiebat flos ille ingenii, ac doctrinæ Socrates (a), ii demum Principes Optimi putentur, atque exoptentur ab omnibus, qui & ipsi Felices sint, & suos possint facere Felices; utrumque hoc decus Borboniæ, & Saxoniciæ gentis proprium, ac peculiare jamdudum esse nobis Deus præmonstrarat: Utrius-

---

(a) *Apud Xenoph. lib. 3. Memorab. Socratis sub initium p. m. 478.*

triusque porro gentis felicitatem in CAROLO nuper , atque in MARIA AMALIA simul condonaverat .

XI. Verum quid attinet diutius bona nostra conjecturâ prospicere , quæ in his plane Principibus coramintuemur ? Quæro enim , qui tandem illi esse putandi sint , quos tanta auspicioꝝ communio portendebat : tanta æquavit conjunctio virtutis : tanta denique omnium expectatio , ac fiducia profecuta est ? Utinam A. A. eos ipsos Reges liceret novorum Conjugum laudatores producere , qui maxime auctores Conjugii fuerunt ! Utinam AUGUSTUS ille aperiret , quæ animi , quæ naturæ ornamenta suspexit in CAROLO , cum eum sibi Generum adlegit , cui suas delicias AMALIAM desponderet ! Utinam ex PHILIPPO disceremus , quid tantum in AMALIA viderit , cur illam tam amanter expe-  
tiit , tam studiose CAROLO adjunxit ! Quid ? Ipsa quoque ELISABETH , præclarissima Hispaniarum Regina , ipsa etiam MARIA JOSEPHA Poloniæ , quas profecto feminas supra muliebrem conditionem ,  
& se-

& sexum incredibilis quædam virtus animi, & sapientia altius evexit, quam mirifice, pro singulari studio, quo illa CAROLUM, hæc AMALIAM, nunc ambos ambæ complectuntur, nobis audientibus iudicium, quoque suum gratularentur! Etenim si, quæ Parentes Augustissimi invicem admirari, atque amare taciti potuere, hæc proferre in medium vellent; videtis A A. quanto etiam liquidius bona hæc nostra ex tantis auctoribus intelligere possemus.

XII. Quamquam hæc nos ipsi nonne, fatis jampridem intelligebamus? ut enim nunc cetera fileam: Principum præsentiam, firmumque in hoc Regno Domicilium quot antea votis, quam diuturnis, quam publicis exposcebamus? Quis non jamdiu videbat, quantopere ad publica Regni commoda pertineret, ut Principes ipsi coram rebus interesse, ut per se tenere clavum, ut gubernacula tractare proxime possent? Sic enim homines sumus: Locorum illa longinquitas, quæ corpora disjungit, abstrahere, scire animos etiam consuevit: Neque e longinquo occurri publicis calamitatibus commode

mode potest, quarum sensus hebes, ac levis  
 pertinet ad absentem: neque distribui facile  
 præmia virtuti, ac benefactis, quorum  
 fama fere nulla, raro integra peregrinatur.  
 Scilicet Sol etiam ille Parens lucis, & astro-  
 rum Princeps, quo nihil est vel ad aspectum  
 pulchrius, vel ad rerum gignendarum va-  
 rietatem fecundius; quique Regiæ dignita-  
 tis illustre exemplar esse visum est (a), cum  
 tamen ab his, quas incolimus, terræ pla-  
 gis annua conversione recessit, vitalem  
 quoque illam vim, ac salutarem corporibus,  
 subtrahit sensim, atque alias in terras longe  
 transfert. Inde absentiam ejus fideris sentire  
 animantes languore quodam, ac macie  
 solent: Tellus etiam ipsa brumali frigore,  
 inertique illo torpore contracta, gravissime  
 ejus ferre desiderium videtur. Quamobrem  
 quam prolixè possem in hac una Principum  
 præsentia gratulari A A. ? Quot recensere  
 bona, quæ in ea insunt, & continentur?  
 Quam magnifice illud prædicare, publicam  
 rem

(a) *Hoc in Urbe Princeps, quod Sol in Cælo.*  
*Plutarch. libel. ad Princ. inerudit. p. m. 280.*

publicam rem deinceps, Fortunamque Regni ita procurandam ab optimo Rege, tamquam in Filiis, Nepotibusque hæsuram: quippe qui non temporarium imperium, ignotis subinde hominibus, aut fortasse, invisus se traditurum, sed in Filios carissimos, atque in Stirpem florentissimam, transmissurum se videt perpetuam potestatem.

XIII. Verum spirat profecto in his Principibus augustior quædam, ac major felicitas, & clariora prælucent publici commodi lineamenta: Quæ utinam ita saltem ponere ob oculos possem, ut nos ipsi gerimus in animo! Hic enim, si unquam alias, hanc orationis duritatem, & quasi tristitiam, doleo: cum opimo maxime, ac tereti dicendi genere opus haberem, quo Principum laudes non tam deterere, quam prosequi videar. Faciam tamen, quod solent ii, qui metallorum causâ terræ viscera, & fibras intus inquirunt: qui satis aliquando habent, auri, argentique venas uberes deprehendisse, quin curent effodere, quod inventum jam, ac repositum sufficere ad divitias arbi-

D

tran-

trantur . Ita prorsus non tam laborabo , quid , & quantum boni habeamus depromere : quam , unde potius , & quam certis ex fontibus habeamus .

XIV. Ego enim sic intelligo , ad publicam felicitatem Principes Naturâ primum conformari : illustrari deinde Fortunâ : Virtute demum perfici , ac perpoliri . Quid autem isti ex natura hauserint ad populorum bona , vestrum patiar esse judicium : Qui egregiam , vividamque indolis lætitiâ , qui natum imperio animum , qui præclaram , ingenii temperationem , atque opportunitatem , multis jam rebus intellexistis . Neque eam loquar , quæ ad naturam accessit , illustris , & plane Regia ratio , conformatioque disciplinæ : unde fieri conjectura potest , si tanta jam annos tempestivitas morum præcucurrit , quid sit futurum , cum ætas maturior acerbior omnem succum , & viriditatem decoxerit . De Fortuna vero neque attinet dicere : quam institutis multo ante cursibus huc usque hos Principes vel deduxisse , vel persecutam esse meministis .  
Virtutis modo ornamenta illa , quæ plurima.

ma sunt, & maxima, quamquam ea quoque in oculis omnium versantur, tamen a me prætereunda in dicendo non sunt. Sæpe enim tacitus cogitavi, si mos ille hodieque viveret, ut Virtutibus Principum publice simulacra ponerentur, quemadmodum ad honestandam Cæsaris lenitatem, olim Romæ Ædes Clementiæ decreta est (a), quanta omnes dubitatio incesset, quam potissimum Caroli, atque Amaliæ Virtutem dedicandam putarent? Alii fortasse, Pietati, ac Religioni primas deferrent: quæ Regnorum felicitates ab illo bonorum omnium Auctore Deo exorat eo facilius, quod illi Reges ipsos pure, sancteque devovet, atque obstringit. Quantam porro hi Principes adversus Deum, ac Superos pietatem, quantum in res sacras cultum, atque observantiam a pueritia imbibierint, quis tam hospes est, qui ignoret? Novimus legitimas illas certis horis quotidie preces: Novimus, quantus in vultu pudor, quanta in ore modestia, quanta in habitu, statu-

D 2 que

---

(a) *Plutarch. in Cæsare.*

que corporis reverentia, cum vel Rei Divinæ quotidie adesse de genu, vel Sacramento expiare animi maculas frequenter consuevere. Vidimus, cum vel supplicationibus publicis interfuit, vel aliis Religionis nostræ cæremoniis, quantum Rex unus præbuerit singulari quadam pietate, spectaculum: Quantum, cum sæpe, omiſſa honestiſſimæ Venationis amœnitate, Magnæ Matris templum religioſe adit supplicaturus. Quid tum donaria referam Superis consecrata? Quid cetera, quæ innumera sunt, Religionis ubique impreſſa veſtigia? Quæ tametſi admirabilia eſſe inficiabitur nemo; tamen putabit fortasſe quiſpiam, tum has præhabendas eſſe virtutes, quæ clam, inſtituunt Regem, ut Deo pareat religioſe (quanquam & iſtuc ad interiorem quamdam animi formam, ac reſeſſum videtur omnino pertinere): tum vero virtutes fortasſe illas publice, ac ſtudioſius exoptari, quæ ita Regem aptant, ut ſibi imperet moderate, ut amanter dominetur in ſuos: quorum alterum in vitæ innocentia, alterum in imperii æquitate conſtituit maximum publi-



cæ felicitatis robur, ac præsidium.

XV. Verum de innocentia quidem, morumque integritate quid ego plura prædicem? quæ ut sapientibus viris non una virtus visa est, sed quædam omnium complexio virtutum; ita in omnem late vitæ partem fusam esse non sine singulari horum Principum laude omnes fatemur. In ore, sane, atque in fermone omnium jamdiu est, nihil fere per hos dies in hac urbe sanctius visum esse, nihil tam ab omni non modo corruptela, sed etiam suspicione solutum, ac liberum, quam Regium adolescentis Principis Domicilium. Audiet certe non sine quadam admiratione futura posteritas nullam illuc licentiam, nullum non modo vitium, sed ne vitii quidem umbram, pervadere unquam potuisse: Id præsertim ætatis, ex qua nescio an plurimi emergere ad bonam frugem denique potuere: his etiam sæculi moribus in deteriora vergentis, qui ad nimiam licentiam, levitatemque late incumbunt; Adolescentem tamen Regem nihil habere antiquius, quam ingenua pudoris insignia, maturæque verecundiæ, ac tem-

temperantiæ ornamenta. Quibus plane, ut  
adverso sole nubes quadam lucis commu-  
nitione colorantur, hanc ipsam Urbem illu-  
strari nuper quoque sensimus A A: cum Rex  
præclarissimus, ingenti cum omnium gratu-  
latione bonorum, omnes prostratæ, vulga-  
tæque pudicitiae feminas ita insecutus est,  
ut quod fieri plerique negabant posse, mœ-  
nibus denique interdixerit, Urbemque to-  
tam tetra illa impurissimi gregis colluvione  
purgarit. Quam interim illud dulce omni-  
bus, quamque jucundum, quod Pios Prin-  
cipes, quod Innocentissimos, mutuis sermo-  
nibus, quodque amplius est, tacitis etiam  
judiciis comprobamus! Quam pene inaudi-  
tum, cum illis per Urbem inveltis (quod  
Alexandro Severo, atque Antonino Pio  
Augustis non sine assentatione factum audi-  
vimus) affusa sæpe ad spectandum multitu-  
do lætis subinde vocibus illud inclamat, Pie  
Auguste, Superi Te servant! Te fortunent  
Superi omnes, Innocens Auguste! Atque  
inter hæc nihil tam ex animi sensu nos lo-  
qui, nihil tam vere Principibus attribuere,  
quam istam Pietatis, & Innocentiæ laudem  
arbitramur.

XVI. Quamquam quod potest esse illustrius documentum egregiæ Pietatis, quam isthæc ipsa æquitas, ac moderatio imperandi? Quæ tanta profecto est, nihil ut doleam, me pro rerum magnitudine pauca dicere, quod sentiam in hac veræ laudis perspicuitate, multo plura, quam dico, vos pro vestra prudentia intelligere. Repetere enim vos ipsi memoria potestis, quantum consilii specimen præ se ferre CAROLUS soleat ad inopinata quoque eventa rerum: quantam in cogitando prudentiam, in judicando perspicaciam, in decernendo maturitatem. Habuit ille quidem a natura ad miserendum, ac benigne faciendum, omnibus miram animi propensionem, qua commoveri eum acerrime suorum calamitatibus, aut periculo aliquo vidimus: hanc tamen ipsam ita sapienter temperat, ut, quæ summa demum bonitas est Principis, animi lenitatem singulari quadam mentis altitudine moderetur. Hinc tanta illa clementiæ laus, ut sola omnium benevolentiam sibi adjunxisse: Tanta rursus justæ severitatis, ut nullam benevolentiam rationem duxisse

videatur . Itaque hac etiam ætate illa duo feliciter conjunxit , quæ sæpe nescio quo indolis diffidio abjuncta , si coalescunt ambo , mutuam in se lucem ex oppositu , & conjunctione refundunt , Principis , inquam , auctoritatem , & Publici Parentis benevolentiam . Adjicite vos præterea A A. tot illa , ac tanta Regalis Providentiæ , Liberalitatis , Beneficentiæ monumenta : quæ in animis vestris , ut par est , altius defixa , taciti , ut video , colligitis . Adjicite comparatos ubique , munitosque aditus ad exercenda commercia , & captatas late quæstus publici , compendiique opportunitates : quibus affectæ jamdiu , & comminutæ hujus regni opes , convalescere paulatim , & consistui optime incipiant . Ac dum cetera , etiam præterimus , sincerum illud laudis genus persolvamus optimo Regi , quod ex Auditorum conscientia magis , quam ex dicentis voce repetatur . Tum illud reputemus , quanta denique , & quam eximia putanda sit hæc omnis bonorum magnitudo , quam neque obscure Deus immortalis præsignificavit ; & Principes præstantissimi , quos  
huic

huic Regno jamdiu optabamus, tam certis quoque rationibus sustinent, & confirmant.

XVII. Illud unum adeo supere sse videtur, ut tam firmis excitata fundamentis, & constituta felicitas, quam diutissime perseveret. Verum hæc etiam honorum diuturnitas, quæ altera Felicitatis pars est, si quid futura præcipere animo mortales possumus, hoc Regali Connubio non modo adpromitti, sed ostendi quoque videtur. Quo in loco cum mihi non tam, ut copiam, & varietatem confecer, laborandum sit, quam ut effugiam satietatem; rem hanc tantam pressius attingam, paucisque concludam. Quamobrem sic habetote A A.: Cum geminum illud sit, gravissimumque securæ diuturnitatis præsidium, singularis Amor Populi, & bene, ac salubriter constituta Regni Administratio: quarum rerum altera omnes omnium animos Regi ultro dedere, ac volentes solet obstringere: altera deditos, obstrictosque moderari amanter, ac firmiter continere; utraque res certe quidem cum semper alias, tum vero hoc tempore,

E

ejus-

eiusmodi est, ut vix ad horum perennitatem honorum cogitari quicquam illustrius, aut jucundius posse videatur. Quid enim ( ut, quod hodie sæpe facio, plurima prætermittam ) quid nisi amorem testari suum, ac benevolentiam loqui incredibilem videtur per hos dies hoc amplissimum nobilissimæ Urbis Theatrum, ad honestandum, Reginæ optatissimæ adventum immensis publici ærarii sumptibus, ac singulari omnium Civium voluntate comparatum? Quid luxus? Quid splendor? Quid populi alacritas? Quid iste omnium hominum, ordinumque concursus, qui inusitato plane gaudiorum genere in summa propemodum voluptate bacchantur? Hæc profecto præclarissima est, Auditores, regnandi ratio, non tam armis mœnia Civitatum, quam animos Civium benevolentia cœpisse (a). Hoc potissimum Regni præsidium, cum, una omnium vox est, ut & Superos adesse Regibus, & Reges perdiu nobis superesse,

exo-

---

(a) *Isocrates ep. 2. ad Philipp. p. m. 410.*

exoptemus (a). Ut enim malus Custos diurnitatis est Metus, quod gemini illi eloquentiæ Parentes sancte monuerunt (b); Ita contra quo longius a metu abest, hoc fidelior est Populorum benevolentia ad Regni perpetuitatem. Quid vero est in vobis Principes suavissimi, quod non mirifice Populi, quod non effusissime diligant? Diligunt enimvero incredibilem istam vitæ honestatem, gravitatem, integritatem, in omni virtute, officioque constantiam: Diligunt ardens, & experrectum incolumitatis publicæ, tranquillitatisque studium: Regiam quoque istam diligunt in cultu, apparatuque, in sumptuosissimis etiam substructionibus magnificentiam: quæ tametsi videtur tota vel ad voluptatem Civium, vel ad Regiæ Majestatem Dignitatis referri; hoc tamen tempore, quo publica quædam calamitatum incurio misere flagellavit annonam, ad sublevandam Populi inopiam, mirum quantum valuisse visa est. Nisi vero

E 2 id

(a) *Aristid. in Romæ Enc. p. m. 107.*

(b) *Tull. lib. 2. Offic. n. 23. & Demosth. 2. Olyntb.*

id habet peculiare ac suum amantissimi Principis magnificentia, ut regium quoque instructum, atque ornatum ipsum, ad suorum commoda referre amet, ac nescio quo pacto facere auctiorem. Qui enim mente, ac cogitatione perlustret, quæ, & quanta ad hujus Regni, Regisque Majestatem brevi intervallo excogitata vidimus, inchoata, atque perfecta; næ is dubitabit, opinor, vehementer; num gloriosior Principi hæc regni tractandi ratio, an populo fructuosior censenda sit. Non modo enim domestica privatorum utilitas, sed communis omnium tranquillitas, ac pristinus ille præclarissimæ hujus Urbis, Regnique splendor, tanta profecto consilii vi, tanta legum æquitate, tam effusis quoque sumptibus fundata, & constituta sunt, ut ad certam perennitatem nihil dudum videretur, nisi hæc superesse arctissima hinc Hispanici, & Gallici, inde Saxonicæ, & Austriaci sanguinis cognatio: quæ Regia denique connubii fide, sacroque, Religionis Mysterio conjuncta, ac firmata est.

XVIII. Quod qui subtilius requirere,  
in-



instituat, ita plane reperiet, multis jam  
 sæculis hanc Urbem ad tantam amplitudi-  
 nem, ac dignitatem nunquam emerfisse,  
 quantam brevi, hoc Rege, est consecuta, at-  
 que hac etiam nuptiali pompa nationibus  
 exteris nunc ipsum objicit suspiciendam.  
 Neque enim hæc ipsa tot Oratorum celebri-  
 tas, qui ab amplissimis Regibus, Rebusque  
 publicis legati sunt: hæc etiam advenarum,  
 & externorum confertissima multitudo, qui  
 visendi studio confluxere, ad instruendum  
 modo pompæ apparatus faciunt: neque  
 solum illud prope silentio admonent, ut  
 sese ipsa Neapolis aliquando norit, cumque  
 se nunc perspexerit, totamque tentarit, in-  
 telligat Sedem jam se a præstantissimo Rege  
 adleclam, Urbem florentissimi Regni Ca-  
 put re ipsa, ac Principem, quo veluti in-  
 aram populi confugiant, & quasi Templum  
 amplitudinis, mentis, consilii venerentur:  
 Sed eo quoque hæc frequentia pertinet, ut  
 ipsi etiam alienigenæ jam intelligant, quam  
 brevi tempore, quam digna hoc Rege, quam  
 digna hoc Regno hæc tam præclara, tam-  
 que frugifera administrandi ratio suscepta  
 sit,

fit, & constituta. Etenim, ut sæpe ad nostras aures externorum Regum res gestæ solent accidere, sic renuntiabunt & illi quidem patriis terris hanc in ipso Aulæ sinu ortam, educamque æquissimæ Moderationis formam: tum ad ceteros quoque Magistratus, quasi per gradus, ex Aula traductam: denique ad omnes ordines, salutaris instar, vitalisque spiritus, late diffusam. Quæ quidem quanta cum laude fama emanatura sit, vos quæso, perpendite: cum illud disseminari longe lateque cœperit, ad publica salutis omnium momenta procuranda eam, adesse CAROLO summorum virorum coronam, quibuscum nemo sit usu rerum, nemo integritate, fide, sapientia comparandus: quibus auctoribus, quæ suo pte ingenio ampla, & magnifica molitur, perficiat commodius, atque absolvat; ut plane, quæ est ad bene, beateque imperandum civilis prudentiæ summa, non ex animi unius solertiâ sapientia Regis pendenda sit; sed quotquot habet consilii participes, atque, administratos, totidem pene animos in se, unus complecti, atque omnium sapientiam

tiam videatur suam, propriamque fecisse.

XIX. Quid tum publica Regni munia? quorum multiplex illa, & implexa series, ita in certos, ratosque ordines, & multo, quam ante, aptiores, dispensata, ac descripta est; ut & ad auctoritatem cumulatiores, & ad res bene gerendas longe ornatiores esse intelligantur. Cum præsertim (quod omnium jam sermone teritur) ad eos honorum gradus hoc Rege aditus nonnisi optimo cuique pateat, immanfuetis, inexploratisque ingeniis præclusus omnino, atque præstruclus. Quo omnes plane sensimus, hæc omnia tam apte tribuere potuisse, tam mature digerere, singularis cujusdam fuisse sapientiæ: ab omni etiam metu, & gratia absolvisse, æquitatis: nonnisi probatissimis denique viris demandata voluisse, divini profecto consilii, integerrimique Principatus. At quæ demum isthæc acerrima quoque Fori, Judiciorumque, emendatio? Quam exoptata bonis omnibus, quam consentanea distrahendis brevi controversiis, quam apta moderandis immensis litium jacturis, infinitisque sumptibus

bus ratio præscripta est! Quæ sancitæ præterea leges, ac latæ salubriter sunt hoc tempore! Ut tantarum rerum opportunitas, & status optime constitutus, non modo per omne hominum genus publice pertineat, verum etiam convelli, ac labefactari nullo unquam tempore, nulla vi posse videatur. Si enim hæc initia novi Regni contuemur: si rerum gestarum magnitudinem cum temporis brevitate contendimus: si hanc denique rerum omnium temperationem, usumque animadvertimus; quis non diuturnamodo hæc, quæ tenemus, bona, sed multo etiam præstabiliora in posterum non sperata præcipiat? Quis ex hac herbescentis prope adhuc, seseque exerentis teneritate felicitatis non auguretur, quantæ olim, cum se annis corroboraverit, quam plenæ utilitatis, ac dignitatis fruges sint exituræ?

XX. Quæ A. A. amplissima illa est, ac lætissima, quam dicebam, bonorum ubertas, & copia, quam hoc regali connubio partim maturuisse, partim in spem minime dubiam adolescere, & nos ipsi sentimus, & nemo exterorum quoque est, quin intelligat.

ligat . Quorum plane bonorum , five amplitudinem species , five diuturnitatem intueare ; absoluta profecto species elucebit Borboniæ illius felicitatis , quam Carolus ante invexit . Neque enim frustra nobis hoc Regale Conjugium auspicatissimum fore divinitus prænunciavit consensus ille conspirans , ac pene conflatus tanta prope æqualitate Borboniæ , Saxoniciæque Fortunæ : Neque istuc ipsum non apertissime Regionum etiam Conjugum augusta virtus declaravit : Nec denique , nisi cœlesti nutu , atque consilio , Populorum hæc benevolentia in Regem , hæc Regis amantissimi in populos divina Moderatio confirmant : Ut dubitare unus jam possit nemo , quin hæc præstantissima tribuenda sit Regi optimo laus , ut putemus , his recentibus Nuptiis Borboniæ illum , Paternæque Felicitati , nostram denique Felicitatem , quasi cumulum , adjecisse .

XXI. Quibus omnibus quanta per vestram fidem dignitatis , ac salutis accessio etiam fiet , cum , id quod omnes enixe ap-

F pre-

## ❁ XLII. ❁

precamur , numerosam ex hoc connubio , similemque Parentibus prolem Regii Conjuges , Deo nobis annuente , susceperint ! Huc enim jam Populorum desideria incumbunt : huc bonorum omnium preces , ac vota referuntur . Videas quamprimum , **REX OPTIME** , quem lætus designes Tibi , ac Regno successorem , ferum illum quidem , & multa prius , ac diuturna Patris institutione conformatum . Videat deinceps longa abs te Regum series pacatissimum Regnum , neque conservatam modo , sed magis magisque auctam , quam præclarissime constituisti , Felicitatem : ut quemadmodum Tu ipse per te optime de æqualibus , ita per tuos de posteris quoque meritis fuisse videre . Hoc omnium , inquam , votum est : hoc nostrum etiam præcipue , quotquot Societati Jesu nomen dedimus : Qui tametsi hujusce regni pars sumus fortasse levissima ; vix tamen quisquam erit , cui , quod possumus , de obsequio Borbonii , Saxonique nominis , cultuque cedamus . Vivit apud nos eorum promeritorum ,

### XLIII.

torum, ac vivet sane memoria sempiterna, quæ in nostrum Ordinem HENRICUS in Gallia, quæ tres deinceps LUDOVICI contulere: quæ in Hispania PHILIPPUS: quæ duo etiam in Polonia AUGUSTI: ut ceteros ex utrâque gente prætermittam. Quæ Majorum merita si ad Vos, AUGUSTISSIMI PRINCIPES, jure quodam, Sanguinis pervenere: si ea etiam, quæ vel temporum, vel locorum longinquitas ab oculorum conspectu submovebat, vos ipsi nobis coram repræsentatis: si tueri illa, denique hac Regia benevolentia, & fovere cœpistis; videtis, opinor, qui sensus, quæ mens, qui animus erga Vos nostræ debeat esse Societatis. Quod si neque Fortuna vestra patitur, nec nostra suggerit remunerandi copiam; quod modo possumus, rerum omnium Auctorem DEUM omnibus precibus propitiatum universi flagitabimus, non ut has modo Nuptias secundare pergat, ac Liberis augere; Sed ut conatibus etiam, ut optatis, ut cogitatis vestris, ad omnium commoda, ad Regni splendorem, ad ve-

XLIV.

ſtri celebritatem nominis immortalem,  
 quam amantiffime adſpiret ſemper,  
 atque  
 obſecundet.



EPI-



# EPITHALAMIUM

Habitu a Joanne Maturantio ejusd. Societ.  
Poetices Professore.



*Venere: rotam clavo Fortuna fugacem  
Sistit io, nostrisque volens in finibus  
hæret.*

*Scilicet hæc nostris deerat pars ulti-  
ma votis,*

*Ut starent bene cæptu: eademque ut fata nepotes  
Exciperent, quibus hæc assurgere cæperat ætas.  
Aurea Tyrrhenas cum Pax venisset ad oras,  
Regalemque manu Juvenem per martia ductum  
Agmina, Cbalcidicis jam concessisset habendum  
Finibus: illæso fluerent cum publica cursu  
Commoda, & optato gauderent Principe Cives;  
Unica sollicito stringebat pectora morsu  
Cura, brevi ne forte hæc tanta exordia rerum  
Effluerent ne forte morâ: præsentibus annis  
Sat CAROLUS, licet unus, erat: sed, ut ista tenaci  
Fædere in ætates fortuna excurreret omnes,  
Non satis unus erat CAROLUS: regnabat in aula  
So-*

*Solus, & ex uno pendebant omnia voto.  
 Nullus adhuc, patriæ specimen virtutis, & hæres,  
 Per fasces reptare Puer gaudebat, apertos  
 Patris in amplexus; cui jure adscripta paterno  
 Sceptra resignaret, dein regnaturus in illo.  
 Erigit banc quoque spem, flammisq; jugalibus Hymen  
 Augustum incendens thalamum, qua parte vacabant,  
 Vota implet: Regumque jubet sperare Parentem,  
 Quem læti Regem aspicimus. Perge, Optime Princeps,  
 Gentis in occursum, quando jam Regia complet  
 Sponsa tuum Te digna latus: jucundius in Te.  
 Lumina jam populi figent, dum bina tueri  
 Ora licet, studiis, nodoque adstricta tenaci:  
 Dum vestram in Vobis prolem, Regumque videmus  
 Innumeram vestra seriem de prole futuram.  
 Ac mihi, dum faciles tanta ad connubia Musas  
 Advoco, Regales Animæ: castique Hymenæi  
 Qua fuce succensus, quo numine inarserit ignis,  
 Aggredior cantu, Vos adspirate canenti:  
 Vos date per vestras tutum discurrere laudes;  
 Quosque Aganippeî collegi e margine fontis,  
 Regalem circa Thalamum conspergere flores.  
 Non mihi nunc primum patrio lætissima vultu  
 Parthenope occurrit: non hæc insueta videri  
 Gaudia sunt, totam quæ circumfusa per Urbem,  
 Mille*

*Mille modis animi sensus testantur ovantes .  
 Jam seges ad quintam producta est annua falcem ,  
 Ex quo letitiæ patuit via : Vidimus olim  
 Sub populo latuisse vias : quæque altius Urbi  
 Instabant , gemuisse gravi sub pondere tecta .  
 Tunc & festivo fremuerunt compita plausu ,  
 Ominaque , & fausti voces præsagia regni  
 Effusæ ; cum hostes , vel citra prælia victos ,  
 Longius avertens , patriis metuendus in armis ,  
 Plus cæli tamen auspicio , fideique suorum  
 Præsidio tutus , revocantem CAROLUS urbem  
 Attigit , ac folio successit victor avito .  
 Tum caput evexit vicino e gurgite Siren ,  
 Pars quondam Imperii Siren , Gentisque remotæ  
 Hospitium , jam Rege suo , veterique potita  
 Imperio : & posita , qua crines cinxerat , alga ,  
 Excepit victrix redivivæ insignia laurus .  
 Ipse etiam pater ipse suo Sebetus ab alveo  
 Exiliit , gaudens fato meliore vocari  
 E Socio Princeps : nec inanem nomen in umbram  
 Desiit : experta est vel primo Patria lustrum ,  
 Regia quantum Urbi Majestas addat honoris .  
 Quam grave consilium rebus , populisque levamen  
 Adjiciat mens præsentis bene provida Regis .  
 Sancitæ leges : Tibemidem penes omne relictum  
 Arbi-*

*Arbitrium in leges ipsas: revocata vetustum  
Pallas in hospitium: virtus, quæcumque jacebat,  
Ad summos evecla gradus: quæque ipsa paternum  
Principis ostentant animum, spectacula passim  
Edita, & antiquis sedes mutata theatris,  
Omnia præsentem testari Commoda Regem.*

*Publica dum facies erat hæc lætissima rerum,  
Officii Siren baud immemor, arbitra quando  
Euboici jam jura maris, sceptrumque tenebat:  
Sebethusque pater, cui circum regia tandem  
Laurus inumbrabat ripas, sua reddere Cælo  
Munera certabant votivis credita signis:  
Altera in augustum sinuata corallia sertum,  
Alter viminea textam de fronde coronam,  
Fortunæ ad Templum votum commune ferebant.*

*Pars ea, quæ latus occiduum complectitur Urbis,  
Collem habet, arridens vultu quem semper amico  
Jucundos Natura loci formavit in usus,  
Pausilypo nomen colli: vicinaque Tethys  
Alluit, & placido lambit vestigia fluctu.  
Alta jugi Fortuna tenet: dixere priores  
Nomine Chalcidicam; populi namque inde precantis  
Excipit, atque implet successu vota secundo.  
Pro solio Templum est centum sublime columnis,  
Cui primi ære rigent postes, cui marmore secto  
Inti-*

*Intimus exultat paries. Longissima rerum  
 Aut ope dædalea, aut pictis animata tabellis,  
 Objicitur circumseries: quæcumque beatam  
 Hanc fecere urbem belli congesta, domique  
 Ornamenta suis hærent descripta figuris,  
 Ipsi præcipue, primos quicumque per annos  
 Hæc solium tenuere, adstant longo ordine Reges:  
 Quos inter, flammæ velut inter luna minores,  
 Emicat Alfonsus: sacram cui bellica frontem  
 Laureæ palladii intersita frondibus ambit.  
 Parte alia insignis galea, stricteque decorus  
 Ense, nitet CAROLUS; primos qui præviis Andes,  
 Unde genus, nomenque habuit, Sirenis adoras  
 Intulit, & regni nova fundamenta locavit:  
 Jamque intra sedem excepti Sebetbus, & unâ  
 Parthenope, rerumque diu monumenta suarum  
 Mirati circum, simul utile Numen adorant,  
 Serta simul votiva addunt: quæ fronte serena  
 Excipiens Fortuna, illa dat sedem locari,  
 Regum ubi in adverso stabant Simulacra: superbum  
 Unde genus traxit, magnique exordia regni  
 Borbonides Juvenis; per quem sibi reddita tandem  
 Parthenope fasces, primævaque Sceptra resumpsit.  
 Tum sic aggreditur, dictisque affatur amicis:  
 Plaudite felici Genialia Numina regni,*

G

Plau-

Plaudit eam, cæptisque diu gaudete secundis,  
 Quid superest: neque enim magnum est habuisse fugaci  
 Gaudia mox abitura gradu. Quando omnia tempus  
 Eripit, incertoque fluunt mortalia cursu;  
 Magna secundarum pars est constantia rerum.  
 Usque adeo accepto gaudetis Principe? tantus  
 Ille amor est vestræ, columenque, & gloria gentis?  
 Huc animos, huc ergo extrema advertite vota:  
 Ut Juvenis, magni soboles Patris, ipse vicissim  
 Gaudeat & magnæ Sobolis Pater esse, novosque  
 Adjiciat Reges, quibus immortale perennet  
 Imperii decus: atque alte radicibus ælis,  
 His commissa semel revirescant lilia campis.  
 Conjugio stant regna: tuis, age, provida rebus.  
 Hac ope præsidium, proles Neptunia, quære,  
 Nam potes: ad solium supplex accede Pronæ,  
 (Nota tibi est, quamquam multis impervia, sedes).  
 Atque ibi, spem populis addat, similisque, precare,  
 Accedat tibi balamo Conjux: numeroque fruatur  
 Aula suo, & faustæ succrescant omina prolis.  
 Dixerat: arrisitque bonis lux aurea dictis.  
 Augustam subito discurrere visa per ædem.  
 Tum Siren: quæ, Diva, mones, nam lumine certo.  
 Sæpe soles rerum seriem explorare futuram,  
 Exequar: atque utinam tua rursum in templa reducar

*Lætior, & votis cumulem majoribus aras.  
 Nec mora, cæruleum ascendit maris arbitra curram;  
 Alatosque manu stimulans delphinas in altum  
 Provocat, & rapido fertur per inania cursu.  
 Jam mare nativum, jam regna, urbesque recedunt  
 Ex oculis, puroque repletas æthere sedes  
 Sponte recedentes tacito secat impete: jamque  
 Pleiadasque, byadasque supra, geminosque triones  
 Evecta ingreditur vasti confinia regni,  
 Humani quæ nulla notant vestigia gressus.  
 Prima loci facies altæ caliginis umbra  
 Circumsepta latet: tenebrosa que mœnia surgunt  
 Hinc atque hinc complexa arcem; quæ fraudibus ullis  
 Haud patet, & vires omnes immota retundit;  
 Audentesque inferre pedem sacer ilicet horror  
 Abstinet ingressu, cæcoque in limine sistit.  
 Arcis in excelsa solium tenet arbitra rerum  
 Alma Pronæ, orbi quo nec præsentius ullum est  
 Numine, nec magis occultum: quas cumque videmus  
 Hic regnare vices, illinc partitur, & omnes  
 Ipsa immota movet cursus: stant omnia circum  
 Tempora, & insueto cœunt præsentia nexu:  
 Stant lauri, fascesque, & mille insignia, legum  
 Materies partim, partim instrumenta suarum.  
 Hæc ubi suspensa Siren penetralia gressu*

Atti-

Attigit, accessum neque enim vetuere reductæ  
 Sponte fores, primum insuetæ spectacula lucis  
 Emersam e tenebris, mox Numinis ipsa, locique  
 Majestas, quamquam locus est, & Numen amicum,  
 Hærentem tenere diu; cum nomine visam  
 Compellat, propiusque Pronæa accedere jussit;  
 Aggressamque loqui, conceptaque vota parantem,  
 Occupat his: Nostri custos fidissima regni,  
 Chara mihi ante alias, nostroque assueta vocari  
 Munere in ausoniis fortunatissima regnis,  
 Agnosco causamque viæ, quæque ultima gentis  
 Vota tuæ tecum materno in pectore servas.

Eveniet: Carolumque brevi factura Parentem  
 Virgo novo accedet thalamo: semperque renascens  
 Borbonidum berebit tyrrhenum in sanguine sceptrū.  
 I Siren: novaque hæc incende ad gaudia cives.

Dixit: & innumeros inter sortita ministros  
 Cælestem Genium, sua mox ad jussu vocavit:  
 Namq; huic imperium est humana in pectora: & unum  
 Si placet in votum, votum componit in unum  
 Occulta virtute animos; junctosque vicissim  
 Arte movet mira, sensusque infundit eosdem.  
 Huic Dea consilium, certæque oracula mentis  
 Explicat, & magni seriemque, modumque revolvit  
 Conjugii æterna jamdudum lege parati.

Qua



*Qua face Borbonides Juvenis, qua Regia Virgo  
Ardeat e Regnis longe quæsitæ Polonis:*

*Quove innexa Rosæ revirescant Lilia cultu,*

*Omnia dat posito penitus dignoscere velo:*

*Nativamque novis confirmans viribus artem,*

*Ire jubet, tædæque animis inferre jugales.*

*Ille opus aggreditur jussus: seque ocyor auris*

*Proripit, & primum Tyrrhenis confidet oris,*

*Orditurque novi fatalia flamina nexus.*

*Est in conspectu Prochyte, notissima Nymphis*

*Insula, ab Ænaria, cui quondam juncæa putatur,*

*Angusto discreta mari: mitissima cæli*

*Temperie, & volucrum raris uberrima turmis.*

*Hic Regem Nymphæ grato exceperere recessu*

*Ereptum curis, atque inter amœna tenebant*

*Otia, nunc rapidas agitantem in retia prædas,*

*Nunc intercæptos gaudentem inhibere volatus.*

*Forte via Juvenis, motuque accensus anbelo,*

*Membra fovens aura circum adspirante sedebat,*

*Nunc mare prospectans, cæli nunc alta sereni.*

*Cum tacitum excipiens Genius, curisque vacantem,*

*Affidet occultus lateri: sensimque per artus*

*Nescio quos blandi sensus instillat amoris,*

*Primaque cælestis diffundit semina flammæ.*

*Inde levem manibus complectens æra, in usus*

H

Ex-

■ LIV. ■

Extendit, versatque novos, & partibus aptat  
 Partes, & vultus, humanaque membra figurat.  
 Materia intenui, possint quæ Virgo videri:  
 Et, si verba addas, si spiritus imbuat artus,  
 Virgo erat. Hæc Juveni formosi corporis umbra,  
 Ut primum objecta est, alio mens avolat: atque hæc  
 Multa memor tacito recolens sub pectore secum  
 Excitat inspectæ quondam vestigia formæ.  
 Talis enim augustas inter depicta puellas  
 Visa olim fuerat peregrino AMALIA cultu  
 Blanditias oculis, vultuque afflare pudico:  
 Utque oculos, utque illa manus, utque ora gerebat,  
 Hæc oculos gerit, ora, manus: geminæque figuræ  
 Nil varium est; nisi forte ea Virginis umbra videri,  
 Hæc Virgo poterat: quæ non formosior illa,  
 Grata tamen magis est, oculisque tenacius hæret.  
 Tunc animum placido Numen Geniale susurro  
 Adloquitur, junctisq; monet componere dextris  
 Fœdus, & in thalami partem, regni que vocare,  
 Quam genus, ac tantæ commendat gratia formæ.  
 Ardet, & ipse suos miratur CAROLUS ignes,  
 Non ante expertus: cæli tum jussa vocantis,  
 Omina que accipiens, quæcunque ea signa tegebant;  
 Numina, ait; neq; enim reus hæc sine Numine Regnum  
 Si placet hoc tandem firmari fœdere: nostrum

Si

*Si Genus Augusto posthac in Sanguine niti  
Firmius, & multa secundum prole renasci.  
Consilium sequar æternum. Pulcherrima regnum  
Impleat, accedat thalamis Amalia nostris.  
Dixerat: arridet Genius, flammæque jugales  
Ter circum excutiens, cæptum bene cedere gaudet  
Conjugium, & primo coeuntia fœdera nexu.*

*Inde alio terras percurrents Sole calentes,  
Fulminis in morem, sua secum incendia ducit.  
Saxoniae fines, atque ipsam Principis aulam  
Occupat. hinc patriis gaudens Amalia rebus,  
(Namque novum addiderat vicina Polonia nuper  
Imperium; regnoque Pater felicibus orsis  
Asserto, titulos Genti instaurarat avitos)  
Virgineis animum studiis exercet: & ultra  
Ætatis virides virtutem promovet annos.  
Adstat, & occultos regali in pectore motus  
Incendit Genius, placidusque immurmurat auri  
Conjugis, & Matris nomen: quosque ille juvenæ  
Flos olim in fructus, melioraque germina crescat,  
Occupat bis vigilem curis: tum noctis amicæ  
Præsidio inducit sopitæ somnia menti,  
Et veram fœta portendit imagine sortem.  
Olli, cum placidæ clausisset blanda quieti  
Lumina, qui Dresdam mediis interfuit undis  
Albis,*

*Albis, & adversas urbem partitur in oras,  
 Visus ab extremo primum succrescere fundo:  
 Inde suos fines, & notas relinquere ripas,  
 Ingressusque novum late discedere cursum.  
 Jamque alia ex aliis lustrat loca: quaque vagatur,  
 Occurrunt populi, atque ultro confinia pandunt,  
 Exornantque viam, & plausa comitantur euntem;  
 Donec ad Ausonias peregrinis fluctibus oras  
 Pervenit, & campos lambens Sirenis, & urbem,  
 Sese aliis immiscet aquis; quas ubere cursu  
 Promovet, & versa senior profundit ab urna  
 Sebetbus: namque hoc dicebant nomine flumen  
 Quæ circum festo ludentes agmine Nymphæ  
 Miscebant bilares hæc inter carmina plausus:  
 „Volvite felices socialia flumina cursus,  
 „Nec mala turbet avis bene cæpti fœderis omen.  
 Hæc dum Virgo avido percurrit lumine, somno  
 Invita excutitur, lucemque accusat iniquam:  
 Usque adeo objecta gaudebat imagine rerum.  
 Tum Patri, quæ visa, refert: qui singula pendens,  
 Magnum aliquod latet hoc rerum sub cortice satum,  
 Exclamat: fluvios in mutua fœdera junctos  
 Agnosco; teneoque omen. Tibi regna, Virumque  
 Terrarum pars illa parat; quam noster inire  
 Albis, & externas misceri visus in undas*

*Aude*

*Aude animis, & spe venturam præripe sortem.*

*Hæc ubi gesta; novum Genius molitur ab alto  
 Conjugii signum populis portendere cælo:  
 Aërios tacitæ sub prima silentia noctis  
 Incendit late tractus: ardorque primum  
 Regna superfuso collucent igne; remotas  
 Inde etiam nova lux vocat ad spectacula gentes.  
 Vidimus hunc ipsi festivis ignibus axem  
 Auspicio fulgere novo, causæque, rei que  
 Ignari; neque enim sua Sol vestigia cælo  
 Liquerat, aut tenues afflarat Terra vapores,  
 Qui fuerant hominum studia in contraria sensus.  
 Dicam equidem, eventu cum rem metimur ab ipso;  
 Dicam audens, flammæ tunc exarsisse jugales,  
 Signatumque jubar, quo mox invecita pudicum  
 In thalamum nostras cumlaret AMALIA sedes.  
 Jamque Oratores aderant, jam regia Virgo  
 Quæritur in thalami partem: promissaque Cæli  
 Auspiciis, facili firmantur fœdera nexu.  
 Quis tunc lætitiæ sensus, cum fama per urbes  
 Excurrit, Regumque implevit Nuncius aulas,  
 Quos jurata fides, aut quos cognatus amico  
 Fœdere jungebat sanguis? quo concita plausu  
 Audiit, excepitque faces Europa jugales,  
 Quis tantæ exarsere Animæ? nil nomine vestro.*

*Altius in sonuit, Gemina jam sidus in unum.  
Conjunctæ, alternoque micantes lumine Stellæ.  
Vester bonos, quicumque fuit, communis utrique  
Crescere in alterutro visus: cæpitque vocari  
CAROLUS AMALIA, Caroloque Amalia felix.*

*Quid tamen externæ teneant me gaudia gentis,  
Majores quando ipsa suos mihi Patria plausus.  
Commemorat? nostrum illud erat, quodcumq; futurum  
Conjugio ex illo signabant omina fatum.  
Noster erat Princeps, cui regia Sponsa parabat  
Dulce Patris nomen, seriemque in prole Nepotum.  
Hæc thalami, solique locum firmaverat Hymen:  
Hos nova Majestas erat ingressura penates.  
Jamque moræ impatiens gelidas tendebat in oras  
Brachia Partbenope: Dominamq; buc supplice dextra  
Maturare viam, nec publica vota morari  
Instabat. Festos ornabat Misnia ludos,  
Regalemque aliis mox concessura Puellam,  
Officii partes, gratique implebat amoris.  
Ipsa tamen nobis minus hæc aliena placebant  
Gaudia, quæ nostris poterant mora parva videri.  
Lentos ire dies, lentas succedere noctes  
Credidimus: spatiiisque novis loca dissita, per quæ  
Ferret iter, nostrisque volens accederet oris.  
Usque adeo impatiens amor est: semperque volenti*  
Lon-

*Longius ex animo nimium expectata recedunt .  
 At nunc lætitiæ successu plena secundo  
 Vota locum cessere : & quæ sperata movebant  
 Gaudia , communes augent præsentia plausus .*

*O si totum animo se nunc infundat Apollo !  
 Exagitetque sinum flammis majoribus Æstrum  
 Grande , novum , quantumque sibi spectacula poscunt  
 Nulli visa prius , nulli servata nepotum !  
 Vidimus undantem populum per aperta viarum  
 Nulla lege rapi , festosque ciere tumultus :  
 Cum pars interea cultæ generosior Urbis  
 Effusa in choreas , duræve addicta palestræ ,  
 Innocuis veram ad pugnam proluderet armis .  
 Vidimus invec̃tas aurato culmine moles :  
 Detinuitque oculos species infueta triumphi ,  
 Quem non exuviæ , non martia signa , nec hostes  
 Terrifico ornabant cultu , sed rite jugali  
 Pax , & Amor præerant , mitissima numina , pompæ .  
 Quid memorem domibus prætenta aulæa ? quid amplo  
 Exceptura viros constructa sedilia circo ?  
 Porticibusque adjecta novis fastigia longo  
 Ordine , & extructis innixa trophæa columnis ?  
 Neu cito defluerent , ipsa in confinia noctis  
 Vidimus ire dies , lucemque , & gaudia gentis  
 Protrabere incensas festivo lumine tures .*

Pa-

*Pascere dum tamen hæc populum spectacula possent ,  
Una oculos , animosque augusto AMALIA vultu ,  
Explevit , tenuitque satis . spectacula desint ;  
Nam nihil est ultra visa quod Virgine species .  
Os illi , frontemque manu finxisse pudica  
Crediderim Charites , membrisque afflasse decorem ,  
Vividaque ætheream sparsisse in lumina lucem .  
Quam blande in populum , qua majestate verendos  
Virgo oculos , eademque movet Regina ! venustam  
Majestas facit ipsa , gravem facit ipsa venustas .  
Gratiaque an cultum dubites , an poscat amorem  
Dignius ; officium nisi quod bene poscit utrumque .*

*Vivite felices , concordi vivite fato ,  
CAROLE flos Regum , tuque o lux altera regni  
AMALIA : in vobis populi Fortuna resedit ,  
Additaque est faustis , quæ pars erat ultima , rebus .  
Quod superest , vestræ nobis Virtutis imago  
Hæreat : & multa vivax in prole resurgat .  
Auguror : augusta Puer en colludet in aula ,  
Par Matri , Patrique Puer : nec Numina fato  
Destituent thalamum , quem complevere , secundo .  
Tunc erit , ut plectrum , Phæbo impellente , resumam  
Lætior ; & prolem , magnosque in prole Parentes  
Plausu rite novo , numerisque recentibus ornum .*



*[The page contains extremely faint, illegible text, likely bleed-through from the reverse side.]*

## L E C T O R

**S**I forte in has voces , *Fatum* , *Fortuna* , *Augurium* &c. incideris ; cave id Poetæ tribuas Catholicæ Religionis tenacissimo . sed poetico more Veterum , fabulis ad elegantiam accommodato , quicquid id est , dictum puta .